

文山集

文山集

宋丞相文山先生全集卷之十三



予指南後錄第一卷起正月十一日賦零丁洋第二卷
起八月二十四日發建康今第三卷蓋自庚辰元日爲
始文山履善甫序

元日

庚辰歲

鐵馬風塵暗金龍日月新
衣冠懷故國鼓角泣離人
自分流年晚不妨吾道春
方來有千載兒女枉悲辛

正月十三日

去年今日遁崖山望見龍舟咫尺間
海上樓臺俄已變河陽車馬不須還
可憐羝乳煙橫塞空想鵲啼月掩關
人世

文山全集 卷之十三
流光忽如此東風吹雪鬢毛班

上元懷舊

禁門三五金吾夜回首青春忽二毛
池上昔陪王晏宴斗中今直貴人牢
風生江海龍遊遠月滿關山鶴唳哀
夢到鈞天燈火闌依然彩筆照宮袍

先太師忌日

太師忌汗漫二紀似跳丸弟妹俱成立
家鄉忍破殘衣冠晨月暗墳墓夜風寒
萬里逢先忌無言把淚彈

遣興

一落顛崖不自由春風相對說牢愁
稚驢黑月光中吼饑

鼠青燈影下遊豈料乾坤成墮甌始知身世是虛舟遙憐
海上今塵土前代風流不肯休

四月八日

今朝浴佛舊風流身落山前第一州
賴上瑤桃俄五稔海中王果已三周
人生聚散真成夢世事悲惟一轉頭
坐對薰風開口笑滿懷耿耿復何求

夜起

夢破東窓月半明此身雖在只堪驚
一春花裏離人淚萬里燈前故國情
龍去想應回海島鴈飛猶未出江城
客愁多似西山雨一任蕭條白髮生

端午感興

千金鑄鏡百神愁功與當年禹服侔
荊棘故宮魑魅走空餘楊子水東流

當年忠血墮讒波千古荊人祭汨羅
風雨天涯芳草夢江山如此故都何

流棹西來恨未銷魚龍寂寞暗風潮
楚人猶自貪兒戲江上年年奪錦標

見艾有感

過眼驚初夏回頭憶晚春已憐花結子
又見艾爲人故國卅心老中原白髮新
靈脩那解化清夢楚江濱

自歎

綠槐雲影弄黃昏
月照牢愁半掩門
一片心如千片碎
十分鬚有二分存
沙邊黃鵠長回首
江上杜鵑空斷魂
豎子溷人漫不省
紅纓白馬意軒軒

七夕

大地風塵惡長天歲月奔
憂來渾是感夢破與誰言
綵鶴空回首河牛暗斷魂
吾今拙又拙無復問天孫

有感

丁丑歲八月十七日家人陷今恰三周而予在行既
十閱月矣有感而賦

平生心事付悠悠風雨燕南老楚囚故舊相思空萬里妻
孥不見滿三秋絕憐諸葛隆中意贏得子長天下遊一死
皎然無復恨忠魂多少暗荒丘

感懷

已卯八月二十四日予以楚囚發金陵十月一日至
燕越五日懼狂今爲庚辰中秋後九日感懷四十
字

去歲趨燕路今晨發楚津浪名千里客剩作一年人鏡裏
秋容別燈前暮影親魯連疑未死聊用托芳塵

哭母大祥

九月七日先母夫人大祥之辰某爲子不孝南望鳴

咽爲哀章一首

前年惠州哭母歛去年邳州哭母暮今年飄泊在何處燕
山獄裏菊花時哀哀王化如昨日兩度星周俄箭疾人間
送死一大事生兒富貴不得力祇今誰人守墳墓零落瘴
鄉一堆土大兒狼狽勿復道下有二男并二女一兒一女
亦在燕佛廬設供捐金錢一兒一女家下祭病脫麻衣日
晏眠夜來我夢歸故國忽然海上見顏色一聲鷄叫淚滿
床化爲清血衣裳濕當年婆緯意謂何親曾撫我夜枕戈
古來全忠不全孝世事至此甘滂沱夫人開國分齊魏生

文山全集 卷之十三
四
榮死哀送天地悠悠國破與家亡平生無憾惟此事二郎
已作門戶謀江南塋母麥蒲舟不知何日歸九骨狐死猶
應正首丘

哭妻文

烈女不嫁二夫忠臣不事二主入上地下惟我與汝嗚呼
哀哉

重陽

庚辰

飄零萬里若爲家一夜西風吹鬢華祇有新詩題甲子更
無故舊對黃花

江南秋色滿梧桐回首青山萬事空怕見鏡中新白髮長

將破帽裹西風

風捲車塵弄曉寒
天涯流落寸心丹
去年醉與茱萸別
不把今年作健看

己卯十月一日予入燕城歲月冉冉忽復周星而
予猶未得死也因賦八句

去冬陽月朔吾始至幽燕浩劫真千載浮生又一年
天南照天北山後接山前
憂裏乾坤老孤臣雪咽氈

己卯十月五日予入燕獄今三十有六旬感興一
首

石晉舊燕趙鍾儀新楚囚
山河千古痛風雨一年周
過鴈

催人老寒花送客愁捲簾雲滿坐抱膝意悠悠

去年十月九日余至燕城今周星不報爲賦長句
君不見常山太守罵羯奴天津橋上舌盡剝又不見睢陽
將軍怒切齒三十六人同日死去冬長至前一日朔庭呼
我弗爲屈丈夫開口卽見膽意謂生死在頃刻赭衣冉冉
生蒼苔書雲時節忽復來鬼影青燈照孤坐夢啼死血丹
心破只今便作渭水囚食粟已是西山羞悔不當年跳東
海空有魯連心獨在

冬至

書雲今日事夢破曉鳴鍾家禍三生劫年愁兩度冬江山

乏小草霜雪見孤松春色蒙泉裏煙蕪幾萬重

戊寅臘月二十日空坑敗被執于今二周年矣感

懷八句

橫磨十里坐無謀回首蹉跎海上州大傳祗圖和藥了將
軍便謂斫頭休乾坤顛倒真千劫身世留連復一周一死
到今如送佛空牕淡月夜悠悠

得兒女消息

故國斜陽草自春爭元作相總成塵孔明已負金刀志元
亮猶憐典午身骯髒到頭方是漢娉婷更欲向何人癡兒
莫問今生計還種來生未了因

除夜

庚辰

門掩千山黑孤燈伴不眠故鄉在何處今夕是窮年住世
真無係爲囚已自然勞勞空歲月得死似登仙
歲暮難爲客天涯況是囚乾坤還許大歲月忽如流夢過
元無夢憂多更不憂屠蘇兒女態肯作百年謀

元日

辛巳

金虬嘶日出鐵騎勒春回天上青門隔人間白髮催霜寒
欺舊草山晚放新梅環堵并牢落東風枉却來
慙愧雲臺客飄零雪滿羶不圖朱鳥影猶見白蛇年宮殿
荒烟隔門庭宿草連乾坤自春色回首一潸然

初六日卽事

車馬燕山開誰家早管絃開門忽見雪擁被不知年篋破
書猶在爐殘火復燃偷挑昨日事回首哭堯天

人日

今年是蛇年此日是人日江右一龍鍾山中舊佔俾獨坐
守大玄一笑發狂疾悠悠王正意哀涕感麟筆

自歎

功業羞前輩形骸感故吾屢判嵇紹血幾無慶公鬚落落
惟心在蒼蒼有意無江流總遺淚何止失吞吳

元夕

燈火喧三市衣冠宴九宸金吾不禁夜公子早行春夢斷
青山遠愁侵白髮新燕山今夕月清影伴孤臣

飄零竟如此元夕幾堪憐南國張燈火燕山沸管絃相思
雲萬里剩看月三年笑與東風道浮生信偶然

先太師忌日

五月二十八日

萬里先人忌呼號痛不天遺孤餘二紀曠祀忽三年永恨
丘園隔遙憐弟妹圓義方如昨日地下想欣然

上巳

予自丙子上巳日真州屏之城門外于今憂患通六年
俯仰時節爲之慨然

昔自長淮樹去帆今從燕薊眺東南泥沙一命九分九風
雨六年三月三地下故人那可作天涯遊子竟何堪便從
餓死傷遲暮面對西山已發慚

寒食

予不登丘隴拜清明寒食八年矣癸酉湖南甲戌乙亥
章貢丙子淮東丁丑梅州戊寅麗江浦庚辰燕山獄中
今辛巳猶未得死和上巳韻寫懷

苦海周遭斷去帆東風吹淚向天南龍蛇澤裏清明五燕
雀籠中寒食三撲面風沙驚我在滿襟霜露痛誰堪何當
歸骨先人墓千古不爲丘首慚